

Særskilt tilskot ved busetting av einslege mindreårige flyktningar med fleire for 2022 kap. 671 post 61

Retningslinjer for forvaltning av særskilt tilskot ved busetting av einslege mindreårige flyktningar mfl., under statsbudsjettet kap. 671, post 61. Fastsette av Arbeids- og inkluderingsdepartementet 01.01.2022, i samsvar med § 8 i Reglement for økonomistyring i staten og kapittel 6 i Bestemmelser om statlig økonomistyring. Retningslinjene trer i kraft frå same dato.

IMDi har ansvar for å forvalte tilskotsordninga.

1. Mål for ordninga

Særskilt tilskot ved busetting av einslege mindreårige flyktningar mfl. (heretter omtalt som det særskilde tilskotet) skal bidra til at einslege mindreårige flyktningar blir busette så raskt som mogleg i gode bu- og omsorgstilbod tilpassa behova til det enkelte barnet og lokale forhold.

Tilskotet skal bidra til at kommunane kan gi gode bu- og omsorgstilbod til andre grupper barn som er i målgruppa for ordninga.

1.2 Kven kan søke om tilskot?

Kommunar som buset personar i målgruppa, kan søke om særskilt tilskot.

1.3 Kven er i målgruppa?

- ✓ Einslege mindreårige flyktningar som er busette etter avtale mellom IMDi og kommunen og
 - har fått vern med flyktningstatus (asyl) i Noreg
 - har fått opphaldsløyve på humanitært grunnlag (asyl)
 - har fått kollektivt vern i ein massefluktsituasjon
 - er overføringsflyktningar

Løyvet for desse gruppene må danne grunnlag for fornying og/eller permanent opphald.

- ✓ Andre i målgruppa:
 - Einslege mindreårige flyktningar som har fått eit fornybart, avgrensa opphaldsløyve på bakgrunn av søknad om asyl, og som er busette med offentlig hjelp.

Løyvet for denne gruppa dannar ikkje grunnlag for permanent opphald og/eller familieinnvandring.

- ✓ Utanlandske barn som oppheld seg i Noreg utan foreldre eller andre føresette. I denne kategorien inngår
 - barn som blir etterlatne av foreldra sine i Noreg medan foreldra oppheld seg på ukjend stad, enten i Noreg eller i utlandet
 - utanlandske barn som blir aleine etter at foreldra er døde

- barn som er moglege offer for menneskehandel eller har vore utsette for menneskehandel
- barn som får opphald medan foreldra ikkje får opphald
- barn som har komme med foreldra sine eller andre med foreldreansvar, der det blir gjort vedtak om omsorgsovertaking medan barnet oppheld seg i asylmottak

Einslege mindreårige er ei fellesnemning på alle barn og unge under 18 år som kjem til landet utan foreldre eller andre vaksne med foreldreansvar i Noreg. Dette inkluderer også einslege mindreårige med følgeperson (einslege mindreårige som kjem til landet i følge med andre vaksne enn foreldra).

Personar i gruppa som er nemnd over, og som er gifte eller har eller skal ha barn, blir rekna som einslege mindreårige.

2. Vilkår for å få tilskot

For å få utbetalt særskilt tilskot må kommunen gjennomføre aktivitetar/tiltak som har som formål å medverke at mål for ordninga blir nådde.

Særskilt tilskot blir utbetalt uavhengig av kva behov den enkelte einslege mindreårige måtte ha for oppfølging, tiltak og tilrettelegging i kommunen.

2.1 Tilskot for ulike kategoriar einslege mindreårige

2.1.1 Einslege mindreårige flyktingar

Einslege mindreårige flyktingar utløyser tilskotet først etter at dei er busette i ein kommune. Særskilt tilskot blir utbetalt i tillegg til det ordinære integreringstilskotet. Vi viser til

Rundskriv 01/2022 for denne ordninga.

Tilskotet skal utbetalast sjølv om personen har fylt 18 år ved busetting, under føresetnad av at personen ved ankomsten til landet var registrert som einsleg mindreårig og **var under 18 år** da opphaldsløyvet blei gitt. Einslege mindreårige utløyser integreringstilskot år 1 med sats for einsleg mindreårig flykting.

Einslege mindreårige overføringsflyktingar som fyller 18 før ankomst til Noreg, utløyser det særskilde tilskotet.

2.1.2 Utanlandske barn utan foreldre og andre føresette

Særskilt tilskot skal utbetalast ved busetting av einslege mindreårige utanlandske barn som oppheld seg i Noreg utan foreldre eller andre føresette.

Denne gruppa kan også utløyse tilskot før busetting dersom dei ikkje er i målgruppa for tilskot til vertskommunar. Kommunen må søke årleg om det særskilde tilskotet så lenge utanlandske barn utan foreldre og andre føresette oppheld seg i kommunen og forholda som dannar grunnlag for å utløyse tilskotet, framleis er til stades.

2.1.3 Omsorgsovertaking av barn i asylmottak

Ved omsorgsovertaking av barn i asylmottak som oppheld seg i Noreg saman med foreldre eller andre med foreldreansvar, vil barnet utløyse særskilt tilskot etter busetting i ein kommune.

Kommunane må søke årleg om det særskilde tilskotet så lenge barnet oppheld seg i kommunen og forholda som dannar grunnlag for å utløyse tilskotet framleis er til stades. Kommunen er forplikta til å kontakte IMDi ved endringar som medfører at tilskotet skal stoppast eller ytast til ein annan kommune.

3. Dette får kommunen i tilskot

Alle kommunar som buset einslege mindreårige, får tilskot etter same satsstruktur og nivå.

Stortinget har fastsett desse satsane for 2022: 1 118 000 kroner for yngre barn til og med det året barnet fyller 16 år, og 705 000 kroner frå og med det året barnet fyller 17 år.

Tilskotet skal utbetalast til og med året personen fyller 20 år.

3.1 Særskilt tilskot i busettingsåret (år 1)

Tilskotet blir berekna frå og med den månaden den einslege mindreårige blir busett. Fordelinga av satsane etter busettingsmånad er:

Månad	Høg sats	Låg sats
Januar	1 118 000 kroner	705 000 kroner
Februar	1 024 833 kroner	646 250 kroner
Mars	931 667 kroner	587 500 kroner
April	838 500 kroner	528 750 kroner
Mai	745 333 kroner	470 000 kroner
Juni	652 167 kroner	411 250 kroner
Juli	559 000 kroner	352 500 kroner
August	465 833 kroner	293 750 kroner
September	372 667 kroner	235 000 kroner
Oktober	279 500 kroner	176 000 kroner
November	186 333 kroner	117 500 kroner
Desember	93 167 kroner	58 750 kroner

3.2 Særskilt tilskot etterfølgande år

Særskilt tilskot for einslege mindreårige som blei busette i åra før 2022, skal utbetalast i fire terminar per år. Forvaltninga av tilskotsordninga er i løpet av 2021 blitt digitalisert. Alle kommunar finn oppdaterte utbetalingsgrunnlag i portalen IMDi Tilskot (sjå IMDi nettsider for tilgang og pålogging).

Tilskotet for 2022 blir utbetalt i fire terminar. Ein fjerdedel av tilskotet for personane som er busette i kommunen, blir utbetalt medio april, medio august, medio oktober og medio desember (eventuelt januar 2023).

Tilskotssatsane er 1 118 000 kroner for yngre barn til og med det året barnet fyller 16 år, og 705 000 kroner frå og med det året barnet fyller 17 år. Tilskotet blir utbetalt til kommunen vedkommande er registrert busett i Det sentrale folkeregisteret (DSF) per 1. januar 2022.

Tilskotet blir utbetalt på grunnlag av registrert dato for busetting i IMDinett (grunnlag frå Datasystem for utlendings- og flyktningsaker (DUF)) og registrert adresse i folkeregisteret (DSF). IMDinett/DUF viser kven som er registrert busett det enkelte året, medan DSF gir ei oversikt over kvar desse personane er registrert busette. Ein viktig føresetnad for at det særskilde tilskotet for einslege mindreårige skal bli utbetalt til riktig kommune, er at personen har meldt flytting til

folkeregisteret (via skattekontoret). Den kommunen personen er registrert busett i, vil få utbetalt særskilt tilskot for einslege mindreårige for 2022. Nytt frå 2022 er at IMDi vil utbetale tilskotet til kommunen personen er registrert busett i ifølge folkeregisteret, jf. punkt 3.2.2.

DSF nyttar både flyttedato og registreringsdato. Det kan derfor hende at ein person har flytta i 2021, men at flyttinga først blir registrert i 2022. I slike tilfelle vil tilskotsutbetalinga bli korrigert ved neste terminutbetaling.

Dersom ein person har flytta til ein annan kommune, er hovudregelen at det ikkje er nødvendig å melde frå om dette. Dersom kommunen blir merksam på at ein person som har registrert flyttedato i DSF, ikkje får korrigert tilskotsutbetalinga, ber vi om at kommunen informerer IMDi via endringsførespurnad i IMDi Tilskot.

Dersom busettingskommunen gjer vedtak etter barnevernlova om plassering i eit omsorgstiltak i ein annan kommune, gjeld regelen i pkt. 3.2.1 for utbetaling av særskilt tilskot frå og med året etter busetting.

3.2.1 Særskilt tilskot til ein annan kommune enn bustadkommunen/opphaldskommunen

Barneverntenesta kan i nokre tilfelle gjere vedtak om plassering i barnevernsinstitusjon eller fosterheim etter barnevernlova i ein annan kommune enn den barnet blei busett i. Dersom ein annan kommune enn bustadkommunen har omsorga og ber utgiftene knytte til omsorgstiltaket, vil kommunen som har omsorgsansvaret, ha krav på å få heile tilskotet. Dette gjeld også integreringstilskotet. I slike situasjonar må

- ✓ busettingskommunen informere IMDi om kva kommune som har kostnadene, og den automatiske utbetalinga av tilskota til bustadkommunen stoppast
- ✓ kommunane det gjeld, inngå ein skriftleg avtale om kva kommune som har kostnadene og skal motta tilskotet
- ✓ kommunen som har kostnadene, kvart år søke IMDi om tilskotet innan utgangen av februar månad, og ein kopi av avtalen mellom kommunane må leggest ved søknaden

Dersom tilskota er utbetalte til bustadkommunen, kan kommunen som har omsorga og kostnadene, krevje å få heile tilskotet overført frå bustadkommunen.

Kommunen kan sende inn avtalen via endringsmelding i IMDi Tilskot eller via digital post til IMDi.

3.2.2 Deling av tilskot mellom kommunar ved flytting.

Dersom ein person som er i målgruppa for tilskotet, flytter mellom kommunar i tilskotsåret, må personen melde frå om flytting til folkeregisteret for at adressa skal bli oppdatert i DSF. Personar har plikt til å melde adresseendringa innan åtte dagar etter flytting, jf. folkeregisterlova § 6-1.

Ved flytting blir tilskotet utbetalt til fråflyttingskommunen ut inneverande og påfølgande månad. Deretter mottar tilflyttingskommunen tilskotet. Det er registreringsdatoen i folkeregisteret som legg føringar for berekning av tilskotsdelinga (inneverande månad). Fordelinga gjeld alle tilskot.

3.2.3 Tvist om deling av tilskot ved flytting

Tilflyttingskommunen har i perioden det blir utbetalt integreringstilskot, berre ansvar for å yte sosiale tenester til den som flyttar dit, dersom flyttinga er eksplisitt avtalt med

fråflyttingskommunen/busettingskommunen (eller det er openbert urimeleg å avslå søknaden), jf. lov om sosiale tjenester.

Dersom flyttinga ikkje er avtalt, kan Nav-kontoret i tilflyttingskommunen avslå søknad om tenester med tilvising til ansvaret busettingskommunen har, med mindre det er openbert urimeleg. Det kan for eksempel vere openbert urimeleg å vise til busettingskommunen dersom vedkommande har nær familie i tilflyttingskommunen eller er offer for tvangsekteskap. Det same gjeld dersom personen er sjølvforsørgande i tilflyttingskommunen, men søker økonomisk stønad i ein nødssituasjon, eller dersom vedkommande treng hjelp etter å ha vore sjølvforsørgd ein periode.

Dersom det oppstår tvist om deling av tilskot mellom kommunar, avgjer IMDi tvisten. Dersom det er ueinighet mellom fråflyttingskommunen og tilflyttingskommunen om kva kommune som er ansvarleg for introduksjonsprogram og opplæring i norsk og samfunnskunnskap etter integreringslova, og økonomisk sosialhjelp etter lov om sosiale tjenester, er det Statsforvaltaren som avgjer dette. IMDi vil legge denne avgjerda til grunn for deling av tilskota.

3.2.4 Tilskot ved dødsfall, tilbakevending til opphavslandet eller reise ut av landet av andre grunnar

Kommunen skal melde (endringsmelding i IMDi Tilskot) frå til IMDi dersom dei får kjennskap til at personar som utløyser særskilt tilskot, er døde eller har forlate landet, slik at IMDi kan stoppe den automatiske utbetalinga av tilskot. Tilskotet skal blir utbetalt til busettingskommunen i tre – 3 – påfølgande månader.

3.2.5 Tilskot når mor/far kjem til landet

Dersom dei føresette til barnet kjem til Noreg, blir tilskotet utbetalt i tre – 3 – påfølgande månader etter at mor og/eller far blir busette saman med barnet. Kommunar som mottar særskilt tilskot, har plikt til å melde frå når mor og/eller far har blitt busette saman med barnet, slik at IMDi kan stoppe den automatiske utbetalinga av særskilt tilskot.

4. Slik får kommunen tilskot

Forvaltninga av tilskotsordninga er i 2021 digitalisert. Kommunane treng ikkje å søke om tilskot for personar i målgruppa for tilskot som er busette eller familiesameinte etter 01.01.2021, da dette skjer automatisk.

For personar det ikkje tidlegare er utbetalt tilskot for, og som er busette i 2020 eller tidlegare, må kommunen framleis søke om tilskot.

4.1 Særskilt tilskot år 1 og etterfølgande år

Kommunane får tilgang til ei oppdatert oversikt over personar som er registrert busette og folkeregistrerte i den enkelte kommunen, ved dei fire terminutbetalingane for integreringstilskot og særskilt tilskot for einslege mindreårige i IMDi Tilskot.

Integreringstilskot år 1–5, barnehagetilskot, eldretilskot og særskilt tilskot ved busetting av einslege mindreårige går fram i det same utbetalingsgrunnlaget (i IMDi Tilskot) saman med ekstratilskot.

For busette i 2022 blir heile tilskotet for busettingsåret utbetalt ved påfølgande termin etter busetting, det vil seie integreringstilskot år 1, barnehagetilskot, eldretilskot og særskilt tilskot år 1.

Integreringstilskot år 2–5 og særskilt tilskot for einslege mindreårige (påfølgande år) blir utbetalte som 1/4 av årssummen per termin.

Kommunane vil etter endt kvartal (dersom det ikkje er informert om eit anna tidspunkt) få tilgang til eit utkast til utbetalingsgrunnlag. Grunnlaget gjeld for heile den gjeldande terminen uavhengig av tidspunktet grunnlaget blir presentert på. Kommunen må gå igjennom utbetalingsgrunnlaga og sende ei eventuell endringsmelding i IMDi Tilskot. Det er mogleg å sende endringsmelding for sjølve personen kommunen ønsker å informere om endring for, og for sjølve utbetalingsgrunnlaget dersom personen manglar i IMDi Tilskot. Kommunen skal også sende endringsmelding for personar som står på utbetalingsgrunnlaget, og som kommunen dermed får utbetalt tilskot for, men som kommunen meiner dei ikkje har rett på tilskot for i perioden. Det kan vere fordi dei kan ha reist ut av landet, er døde eller er ukjende for kommunen.

Kommunen skal kontrollere utbetalingsgrunnlaget og sende inn endringsmelding så snart som mogleg. Endringsmeldingar vil bli behandla fortløpande. På ein seinare fastsett dato vil sjølve utbetalinga utførast, uavhengig av om alle endringsmeldingane er korrigerede / gitt svar. Korrigerende etter utbetalingsdato vil effektuerast og komme fram på neste termin.

Ved søknad om tilskot for personar busette før 01.01.2021 er rundskriv og søknadsskjema tilgjengeleg på www.imdi.no

5. Utbetaling av tilskot til kommunen

Utbetaling av tilskotet skal skje i samsvar med IMDi's interninstruks for økonomiforvaltning, og fortrinnsvis etter utgangen av årets fire kvartal.

Særskilt tilskot år 1 er differensiert og blir utbetalt til kommunen i samsvar med busettingsdatoen. Særskilt tilskot er ikkje differensiert frå og med år 2, og skal som hovudregel utbetalast i fire terminar. Utbetalingstidspunkta er ultimo april, medio juni, medio oktober og medio desember.

6. Oppfølging og kontroll

Kommunane skal ikkje legge fram særskild rekneskap og rapport for bruk av særskilt tilskot.

Kartlegging av utgiftene kommunane har til busetting og integrering av einslege mindreårige flyktningar, blir gjennomført årleg av eit berekningsutval der både staten og kommunesektoren er representerte.

IMDi og Riksrevisjonen kan sette i verk kontroll med at midlane blir nytta etter føresetnaden, jf. bevilgningsreglementet § 10 andre ledd og riksrevisjonslova § 12 tredje ledd.

7. Foreldingsfrist

Den alminnelege foreldingsfristen er tre år rekna frå den dagen fordringshavaren tidlegast har rett til å krevje oppfylling, eller for utbetaling av integreringstilskot, frå det tidspunktet kommunen tidlegast har rett til å krevje tilskotet utbetalt, jf. foreldingslova § § 2 og 3.

8. Klagereglar

Tildeling av tilskot og krav om tilbakebetaling av særskilt tilskot er ikkje eit enkeltvedtak etter forvaltningslova (fvl.) § 2 første ledd bokstav b. Kommunane har derfor ikkje klagerett på verken tildeling av tilskot eller krav om tilbakebetaling av tilskot jf. fvl. §§ 3 første ledd og 28. Utover det gjeld saksbehandlingsreglane i forvaltningslova.